



16. marts 2006

UPA 2006/40

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumu-una saqqummiupparput:

Pisortanit pensionisiat pillugit Inatsisartut Peqqussutaata nr. 9, 15. april 2003-imeersup allanngortinneqarnissaa pillugu, utoqqalinermi aamma siusinaartumik pensionisiat imaalersilugit, "pensionisiaq tunngaviusoq" aalajangersimasoq nikerartinneqarsinnaanngitsoq, aammalu "pensionisianut tapeq" isertitat naapertorlugit nikerartinneqarsinnaasoq pillugit kingusinnerpaamik Inatsisartut ukiakkut 2006-mi ataatsimiinnissaannut Naalakkersuisut allannguutissamik siunnersuuteqarnissamik peqquneqarnissaannik Inatsisartut aalajangiiffigisassaattut siunnersuut.

(Siumup Inatsisartunut ilaasortai)

Tunngavilersuut:

Ukiorpanni utoqqartavut utaqqisippavut. Tamanna taamaalineqartariaqarpoq, ukiortaamiillu 2007-imit atugarisaasa pitsanngortinnissaat kissaatigaarput.

Inuuniarnerminni atugarisaat ajorseriassanngillat, nunattalu atugarissaarfiunerani peqataasariaqarput; ulluinnarni inuunermi ataatsimooqatigiiffiusunut kulturikkullu pisartunut akuunissaannut periarfissagissaartitsisariaqarpugut.

Utoqqartagut utoqqalinersianik naapertuuttunik, sumiluunniit suliffeqarsimaneri apeqqutaatinnagu, pissaqartittariaqarvavut. Suliffissaqartitsiniarnermi suliniutitigut aalajangersakkat naapertorlugit sulisinnaasariaqarput.

Sulisinnaasut akuunerulernissaannik kaammattorlugit tapersersortuartariaqarput, inuiaqatigiinnilu utoqqalinersiaqartarnermi aqutissanik pitsaasunik periarfissaqartuarternerisigut; sulisuusut siusinaartumik soraarnerussutisiaqalernissaannik kaammattorneqassanngillat, utoqqalinersiaqalertarnerullu killissarititaa qaangerlugu suliiinnarpata pillarnagit; soraarnerussutisiaqalertarnerulli iluarsartuunneragut suliiinnaariartuaartarnissamut periarfissaqartittarlugit.

Manna siunnersuut naapertorlugu, tunngaviusumik pensionissianut kisimiittuuneq, katissimasuuneq inooqateqartuunerluunniit sunniutaarutinneqarput, imaalillugu tunngaviusumik pensionisiat nammineerluni isertitanit, aapparisaq inooqatigisalluunniit isertitaanit nikisinneqarsinnaajunnaarlugit.

Pingaartilluinnarparput 2007-mut Aningaasanut Inatsisissatut siunnersuummut ilanngullugit utoqqalineri pensionisiat siusinaartumillu pensionisiat aaqqiissuteqarfigineqarnissaat.

Siunnersuutip aningaasatigut kingunerisinnaasai soorunami nalilersortariaqarput.

Pensionitigut iluarsissutissat pingaarnerit imaattut siunnersuutigineqarput:

Utoqqalinermi pensionisialinnut siusinaartumillu pensionisialinnut ”Tunngaviusumik pensionisiat” tamanut ukiumut 60.000 kr.-t aalajangiunneqasassut.

”Tunngaviusumik pensionisiat” allanik isertitaqarneq tunngavigalugu nikerartinneqartassanngillat.

Kisimiittunut, aappariinnut inooqatigiinnullu, aappaasoq kisimi pensionisiaqarsimappat, ”pensioninut tapeq” ukiumut 30.000 kr.-ussasoq.

Aappariit tamarmik pensioneqarpata ”pensioninut tapeq” ukiumut 24.000 kr.-ussasoq.

Utoqqalinermi- siusinaartumillu pensionisiat, kisimiittunut aappariinnullu aappaanna pensionisiaqarsimappat, pensioninut tapeq ilanngullugu ukiumut 90.000 kr.-ussapput.

Aappariit tamarmik pensioneqarsimappata, utoqqalinermi- siusinaartumillu pensionisiat pensioninut tapit ilanngullugit ukiumut 168.000 kr.-ussapput.

Pensionit isertitatut akileraaruteqaataasussaapput.

Pensioninut tapit ikilisinneqartarnerat utoqqalinermi- siusinaartumillu pensionilinnut kisimiittunut aammalu pensioninut tapit ikilisinneqartarnerat aappariinnut inooqatigiinnullu utoqqalinermi siusinaartumillu pensionisialinnut aappaanna pensioninik pisartagaqarsinnaatilugu:

Kisimiittut, aappariit inooqatigiillu allanik isertitaqarsimatillugit ”pensioninut tapit” ikilisinneqartassapput makku tunngavigalugit:

Tunngaviusumik pensionit pensioninullu tapit saniasigut ukiumut 45.000 kr.-t tungaannut isertitallit pensionit tapiisigut ilanngaavigineqassanngillat.

Ukiumut 45.000 kr.-t 90.000 kr.-llu akornini isertitallit pensioninut tapisiaat 25 % -timik ilanngarneqartassapput, ukiumut 22.500 kr.-ussallutik.

Ukiumut 90.000 kr.-t 135.000 kr.-llu akornini isertitallit, pensioninut tapisiaat 50 % -timik ilanngarneqartassapput, ukiumut 15.000 kr.-ussallutik.

Ukiumut 135.000 kr.-t 180.000 kr.-llu akornini isertitallit, pensioninut tapisiaat 75 % -timik ilanngarneqartassapput, ukiumut 7.500 kr.-ussallutik.

Ukiumut ataatsimoortumik 180.000 kr.-t qaangerlugit isertitallit pensioninut tapisiaaruttassapput.

Pensioninut tapit ikilisinneqartarnerat aappariinnut inooqatigiinnullu utoqqalinermi siusinaartumillu pensionisialinnut tamarmik pensioninik pisartagaqarsinnaatillugit:

Aappariit inooqatigiillu tamarmik pensioninik pisartagaqartillutik allanik isertitaqarsimatillugit ”pensioninut tapit” ikilisinneqartassapput makku tunngavigalugit:

Tunngaviusumik pensionit pensioninullu tapit saniasigut ukiumut 67.500 kr.-t tungaannut ataatsimut isertitallit pensionit tapiisigut ilanngaavigineqassanngillat.

Ukiumut 67.500 kr.-t 135.000 kr.-llu akornini ataatsimut isertitallit pensioninut tapisiaat 25 % - timik ilanngarneqartassapput, ukiumut 36.000 kr.-ussallutik.

Ukiumut 135.000 kr.-t 202.500 kr.-llu akornini ataatsimut isertitallit, pensioninut tapisiaat 50 % - timik ilanngarneqartassapput, ukiumut 24.000 kr.-ussallutik.

Ukiumut 202.500 kr.-t 270.000 kr.-llu akornini ataatsimut isertitallit, pensioninut tapisiaat 75 %-timik ilanngarneqartassapput, ukiumut 12.000 kr.-ussallutik.

Ukiumut ataatsimoortumik 270.000 kr.-t qaangerlugit isertitallit pensioninut tapisiaaruttassapput.

Tunngaviusumik pensionit aamma pensioninut tapit ukiut pingasukkaarlugit periusissatut aalajangersakkat naapertorlugit iluarsiivigineqartassapput.